

ATXILOKETAK. «Salbuespen egoera» erakusten du, EHren iritziz

Makazagak maiatzaren 4an berriz deklaratu arte atxilotuta jarraituko du

Erresuma Batuan atxilotutakoa atzo eraman zuten epailearen aurrera, lehen aldiz

Erredakzioa | **DONOSTIA**

Iñigo Makazaga Castillo gasteiztarra atzo eraman zuten epailearen aurrera Erresuma Batuan. Makazaga, 23 urtekoa, asteazken goizaldean atxilotu zuten, Doverren, Erresuma Batua utzi eta Frantziara pasatzera zihoanean. Gazteak dokumentazio faltsua zuen atxilotu zutenean. Poliziak adierazi zenez, Frantziako Polizia konturatu zen dokumentazioa irregularra zela, eta Erresuma Batura itzuli zuten bertan atxilotu zezaten.

Atxilotu ostean, Makazagak berak jakinarazi zion bere sendiari atxilotuta zegoela, telefonoz. Gazteari ofiziozko abokatu bat jarri zioten, eta atzo igaro zen epailearen aurretik. Amnistia Aldeko Batzordeak adierazi zutenez, ordea, bere konfiantzazko abokatua eskatu du

Makazagak, eta, abokatu britainiar horrek eskatuta, maiatzaren 4an igaroko da berriro epailearen aurretik. Bitartean, epaileak atxilotze aldia luzatu dio, astebete. Atxilotua ez dago inkomunikatua eta, beraz, abokatuarekin egoteko aukera izango du. AABek azaldu zutenez, asteburuan bere senitartekoak eta abokatu bat ere joango dira Euskal Herritik Erresuma Batura gaztea ikusten saiatzera.

Makazagak Espainiako Entzutegi Nazionalan bi auzi dituela zabaldu zuten atzo berri agentziek. Batean, atentatu baterako informazioa biltzea leporatzen diote, eta bestean, erakunde armatuari laguntza ematea. Gasteiztik hurbil dagoen Arakako militarren kuartelaren kontra eginiko atentatuarekin lotzen du Espainiako Poliziak gaztea. Atentatu hori 1997an gertatu zen. 40 kilo lehergai ja-

ri zituzten, bi kargatan; haietako bat indargabetu egin zuten, eta besteak kalte materialak egin zituen. Atentatu hori egiteko planoak ematea leporatzen diote Makazagari, soldaduska zentro horretan egin zuela eta. Atentatu horregatik bi lagun zigortu zituzten Entzutegi Nazionalan.

EHren irakurketa

EHk oharra kaleratu zuen, Iñigo Makazagaren atxiloteta dela eta. Bere ustez, Makazagaren atxilotetak Euskal Herrian den albuespen egoera islatzen du, «PPk eta PSOEek ezarritako albuespen egoera, EAJ eta EAren laguntzarekin». «Salbuespen egoera horrek milaka euskal herritar beren herria uztera behartu ditu, erbestera joatera euren ideiak defenditzeko». Gertaera horrek Euskal Herriko gatazka konpondu beharra adierazten duela azaldu zuen EHk. Erresuma Batuko Justiziari deia egin zion hainbat euskal herritarrek eginiko tortura salaketak entzun ditzen.

LAGUNAK

EAren eta Espainiaren arteko gatazka fiskalak konpontzeko batzordea maiatzan bilduko da



EGUNKARIA
Javier Urizarbarrena.

Kontzertu Ekonomikoa berritzeko negoziazioak etenda egon arren, fiskalitatearen inguruko gatazkak konpontzeko elkarrizketa bideak zabalik daude Madril eta euskal erakundearen artean, Javier Urizarbarrena Bizkaiko Ogasun diputatuak iragarri duenez. Hala, iazko urtarrilean *bake fiskala* sinatu zeneko hitzarmenak sorrarazitako erakundea, zerga arauak aztertzekeo batzordea, datorren maiatzan elkartuko da aurreneko aldiz. Batzorde

hori 12 kidek osatzen dute, alde bakoitzetik seik, eta fiskalitatearen inguruko ezadostasunak auzitara ez eramateko helburuz eratu zen. Hala, Estatuak hainbat zerga arauen aurka jarritako errekursoak aztertuko ditu.

'ETA ez' dioen pankarta udaletxe aurrean jartzea onartu du Irungo Udalak

Iruren atzo eginiko udalbatzarrean, udaletxe aurrean *ETA ez* pankarta jartzea onartu zuten, PSE-EE, PP eta talde mistoaren aldeko botoekin. EAJ-EA, aldiz, abstenitu egin zen, eta EHk aurka bozkatu zuen. PPko Irungo Udaleko bozeramaile Borja Semperrek esan zuen ulergaitza dela EAJk duen jarrera «demokratek terrorismoaren aurka hartu beharreko erabaki hain bistakoetakoaren» inguruan.

Pertsona bat bere kabuz aurkeztu da Entzutegi Nazionalan, baina ez du deklaratu

Iratxe Sorzabal presoaren polizi deklarazioan agertzen zen pertsona bat, Arantza Arretxe, atzo Entzutegi Nazionalera joan zen bere borondatez, abokatua lagun zuela, deklaratzera. Ismael Moreno kasuko epaileak ez dio beharrezkoa iritzi Arretxeri deklarazioa hartzeari, ezta bere kontrako neurririk hartzea ere. Sorzabalek esan zuen azken horrekin harremanak izan zituela.

Etxeberria, Garcia Gaztelu eta Bienzobas presoak Fresnaseko espetxetik Fleuryra eraman dituzte

Senideek jakinarazi dutenez, Lander Etxeberria eta Xabier Garcia Gaztelu Fresnasetik Fleury Merogis espetxera aldatu zituzten, eta Jon Bienzobasen kasuan atzo hartu behar zuten erabakia. Hiru euskal presoek 30 egun zeramatzaten bakartze ziegan, Fresnaseko bizi-baldintza gogorrek salatzen. Ziegan horretan gehienegon egon zitezkeen denbora bete ondoren, espetxetik aldatu zituzte. Julia Moreno eta Monika Martinez euskal presoak ere bakartze ziegan daude Fresnasean, eta horiek datorren astean egingo dituzte 30 egun bakartze ziegan, eta orduan espetxeak erabaki beharko du haiekin zer egin.

Arabako Batzar Nagusiek ez dute onartu Trebiñoko auzian IU-EBk aurkeztu mozioa

IU-EBk, Arartekoak eta Espainiako Herriaren Defentsariak Trebiñoko auzian parte hartzekeo aurkeztu zuten mozioa ez zuen onartu Arabako Batzar Nagusietako Trebiñoko Batzorde Berreziak, PP, PSE-EE eta UArekin aurkako botoekin. EAJ eta EAKo bozeramaileek alde bozkatu zuten, eta EHko bozeramaileak, berriz, ez zuen bozketan parte hartu, mozioarekin ez zegoelako ados.

Hainbat preso aurrez aurrekorik gabe utzi dituzte

Unai Parot euskal presoak Kordobako espetxetik Alcalá Mecora eraman zutenez, aurrez aurrekorik gabe geratu zen. Soto del Realen dauden euskal presoak ere aurrez aurrekorik gabe geratu ziren, bakartze ziegan dauden Iratxe Sorzabal eta Olatz Eigureni elkartasuna adierazteagatik. Halaber PCE(r)ko eta Grapoko hainbat preso bakartu egin zituzte, preso horiei elkartasuna adierazteko protestagatik.



JOSU ETXEBARRIOSTE

Duela 64 urteko egun iluna kandlekin argituz

Gernikako bonbardaketa gertatu zeneko 64. urteurrena bete zen atzo, eta, urteroko moduan, zenbait ekitaldi izan ziren gertaera oroitarazteko. Gernikako Udalak antolatuta, ekitaldi bat egin zuten hilerrian goiz partean. Iluntzean beste ekitaldi

bat ere egin zuten, udaletxeko plazan. Plaza bete kandelak jarri zuten. Musika piezak, koroa eta beste zenbait ikuskizun izan ziren, eta amaieran bertaratutako jendea banan-banan kandelak hartu eta pizten hasi zen. Haurrak hasi ziren lehenik, baina gero nagusiak ere bildu ziren kandelak hartzera eta piztera. Piztutako kandelak plazan jartzen joan ziren poliki-poliki. Udalak antolatutako ekitaldiez gain, Gernika Batzordeak deituta, manifestazioa egin zen iluntzen partean.